

ումանք ասեն 'ի բախտէ. այս ամենայն հաստատեալ կայ 'ի մէջ բնութեան մերոյ, այլ 'ի մէջ այս անշափելի և փոփոխական բնութեանս ունիմք անշփոթապէս միաւորեցեալ հոգի բանական, որում 'ի Տեառնէ արարչէն փշմամբ ընկալաք, որպիսի և ուստի սկսեաց և որում կերպարանի և որպէս բնակի ընդ մեզ և կատարումս զինչ լինելոց է՝ թողից զի ընթերցուք 'ի սուրբ գրեանց շառաւիղել 'ի սրբոց մերոց:

Այլ որովյետև ժամանակն ամաց կենաց մերոց 'ի ներքոյ արեգական և 'ի վերայ աշխարհի՝ ըստ ասացելոյն մարգարէին, եօթանասուն ամ և 'ի տեսողութեան մերոյ այժմոյս միևնոյն բնութիւնս մեր այնքան փոփոխական է որ ոչ ոք կարէ հաստատիլ 'ի միտս իւր, թէ զի արդ՝ կացցէ և մնացէ, զի գտցի բարեպէս վարել զկեանս իւր վասն Օգտութիւն հոգւոյ և մարմնոյ իւրոյ. թէպէտ բերան Տեառն խօսեցաւ վասն բնութեան մարդոց 'ի վերայ երկրի՝ այսինքն զանձեցէք զգանձս ձեզ յերկինս ուր ոչ զող մերձենայ և ոչ ցեց ապականէ, այլ նաև ասաց 'ի մէջ առակին քանքարոյ պահին՝ թէ որ 'ի փոքուն հաւատարիմ է՝ բազմիցս ևս հաւատարիմ գոյ կարէ, նա ևս թէ՝ որդիք աշխարհիս իմաստնագոյն են քանթէ որդիս լուսոյ, որ բանս այս եղև 'ի վերայ առն հնարագիտի տնտեսին, նաև էկլէզիաստիկն զրէ ասելով՝ թէ ունայնութիւն ունայնութեանց ամե-